

Date – 29/10/2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma chuan Mizoram dinhmun dik tak hriat a pawimawh avangin sorkar deparment-te chu Data dik tak vawng turin a chah**
- 2. Home Minister Pu K Sapdangan VIP Culture tibo turin ZPM sorkar chuan hma la in tunah chuan airport ah pawh mipuite nen ang khatin an zin veivak ta a ni, a ti.**
- 3. Prime Minister Narendra Modia cuan nimin khan Gujarat-a Amreli atangin hmasawna project hrang hrang cheng vaibelchhe 4900 hu a hawng.**
- 4. Indian Cybercrime Coordinationi Centre (I4C) chuan internet kaltlanga pawisa thawna lem lakah mipuite fimkhur turin a chah.**

<><><>

CM MPLAN

Chief Minister Pu Lalduhoma chuan Mizoram dinhmun dik tak hriat a pawimawh avangin sorkar deparment-te chu Data dik tak vawng turin a chah.

Nimin khan Planning & Programme Implementation Department Conference Hall-ah Chief Minister Pu Lalduhoma chuan Sustainable Development Goals Dashboard thar leh Project Monitoring Committee Dashboard thar (MPLAN) a hawng a. Data lakkhawm hna kalpui zui nghal a ni ang.

Chief Minister chuan, Dashboard pahnih te chu Data dik tak thunluh hmanga kalpui tur a ni a ti a. Data dik lo an thun chuan an dinhmun dik tawh lo a pho chhuahtir dawn a. Chuvangin Department tinten an data-te chu dik tak chauh thun turin a chah a ni. Data dik a nih phawt chuan tlakhniam deuh pawh hreh lo turin a ti a. An dinhmun dik tak an hriat kha a pawimawh hmasa a ni, a ti.

Pu Lalduhoma chuan, ruahmanna te chu khuarei daih hmasawna thlentu an nih a ngai a ti a. Project thenkhat chu tha tak angin lang mah se kawng danga tichhetu a lo ni ve reng thei tih sawiin, project khuarei daih leh tha zel thlan thiam a ngai, a ti a. Project kal fuh tawh lo, hna hlamzuih te, a huna zo thei lo te a awm loh nana vil rengtu tur project monitoring committee an nei tawh a, member pawh mipui huapzo tak a ni a ti bawh. CM chuan project te chu kal tluang se, a hun taka zawh theih ni se, Mzoram chak takin hmasawna hmu se a duh tih a sawi.

SDGs dashboard hi Ministry of Personnel Public Grievances and Pension leh Planning and Programme Implementation Department te sum thawh dun hmanga siam a ni a. A siam turin UNDP te chu thawhpui an ni. Sustainable development goals lama state level atanga village level thleng vilna tur a ni. Mizorama khua zawng zawngte SDGs dinhmun a en theih ang a, Block level dinhmun te, district level dinhmun chenin a en theih ang. SDGs Local Indicator Frameworks hi state sawrkarin a duh dan ang a duan tur a ni.

MPLAN Dashboard hi Integrity Tech Solutions Private Limited te nena siam a ni thung a. A siamna tur sum hi NITI Aayog State Support Missions atanga hmuh cheng nuaih 69 leh sing 9 a ni. He dashboard hi project proposal te, DPR te thehluhna tur a nih bakah cost benefit analysis te, project feasibility te lo zirchian thlengin a thawk thei a. Project ziaktute tan state level data pawimawh hriatna a pui thei bawk ang.

<><><>

HEALTH MINISTER

Health Minister Pi Lalrinpui'n nimin khan a pisa ah Food Safety lam hotute kovin mipuite tana eitur hrisel leh thianghlim chhawpchuah kawnga hmalak dan tur hrang hrang a sawipui.

Minister chuan Mizoram mipui tlemte zingah natna hrang hrang nerve thalo atanga cancer thlenga vei an tam tih sawiin natna thlentu zingah hian ei leh in hrisello leh thianghlimlo chu a chhan bulpui pakhat a nih tel avangin eitur thianghlim neih kawngah nasa zawka hmalak a ngai a ti a, Mizoramin Food Testing Laboratory changtlung a neih theih nan a hmun tur GAD-ah dilna a thlen tawh thu sawiin, a sakna tur sum Sawrkar laipui lamah ngaihtuaha Testing laboratory tha leh changtlung neih theih nana theihtawp chhuah tlan a tul thu a sawi a. Mobile Food Testing VAN neih mek leh Testing Laboratory-a khawl neih chu mipuite'n tangkai leh tha zawka an hman theih nana hma la turin thawktute a chah bawk.

He hunah hian Food Safety hotute chuan report pein, thawktu indaihlohna avang leh testing laboratory changtlung neih loh avangin nasa zawka hmalak a harsat thu Minister hnenah hian an thlen a. Tunhnaia FSSAI ranking-a Mizoram dinhmun hniam lutuk chhan pawh thawktu neih tlem avang leh chhan dang dang avangte a nih thu an sawi bawk.

<><><>

WATER SUPPLY

Public Health Engineering (PHE) minister Prof. Lalnilawma chuan ruahman anga an kaltluang thei a nih chuan Aizawl khawpuiah November thlaah chuan tui sem dan pangngaia sem leh theih tawh an beisei tih a sawi a.

Cyclone Remal avanga Tlawng lui lian nasa in Aizawl khawpui tui lakna Greater Aizawl Water Supply Scheme (GAWSS) Phase I & II a chhiat avangin tui Pump theih zat a tlahniam, hei hian mipuia tuisem a nghawng zui zel a, PHE Minsiter chuan, PHE Department thawktu ten chhun zan zawmin a siam hna an thawk reng tih a sawi a, November thlaah chuan tui sem dan pangngaia sem theih tawh an beisei avangin mipuite chu dawhthei taka lo nghak turin a ngen.

Kan Corr chuan nimin khan Aizawl veng thenkhata tuisem dan zawt kualin, mi thenkhat chuan PHE tui sem an kham khawp loh avangin mimal zawrh an lei thin tih an sawi a, hetihlai hian fur ruahtui a tla reiin a tlak tam hlah avangin ruahtui khawl thei ten harsatna an tawk lo a, ruahtui dawhna siamthar pawh an thehnem hle bawk a ni.

Kan corr report lo ngaithla ang.

VC

(Aizawl khawpui chhungah ruah tui dawhna nei lo, sorkar tui sem ringawt ring an awm a, heng chhungkua te hian harsatna an tawk nasa zual a, kham khawp an hmuh loh avangin mahni sum senga Tui lei an awm reng a, hei vang hian ruah tui tlak tam lai pawhin kum tluana tui zuar an awm bawk a ni.

Aizawl khawpui chhungah hian mimal, Pik-Up hmanga tui zuar an tam a, Tui zuartu pakhat kan kawm chuan, tun dinhmunah Tui Liter 2000 chu cheng 1000 in an hralh thin tih a sawi a, fur ruah tui a tlak rei avangin kum dang angin hralhna a an hmuh tam lutuk lo deuh niin a sawi.

Hetih lai hian PHE department chuan ni tin tui litre nuai 390 an pump thei tawh tih an sawi a, hei hian Aizawl khawpui mamawh zualpui chu a phuhru thei an ti a ni.)

<><><>

HOME MINISTER

Home Minister Pu K Sapdangan VIP Culture tibo turin ZPM sorkar chuan hma la in tunah chuan airport ah pawh mipuite nen ang khatin an zin veivak ta a ni, a ti.

Nimin khan ZPM General Headquarters Party Office ah hun hmangin Home Minister chuan, Sorkarna an chelh tirh atang khan ram kawtchhuah check gate-a duty kutkem neite nuaibo hna theih tawpin an thawk nghala, checkgate zawng zawngah sorkar phalna lo chuan sum lak leh khawn an phal tawh lo a ti a, Foreign kuhva tawlh ti bo turin theih tawp an chhuah mek a, sorkar hmasa hun laia zung a lo inkaih thuk tawh a vangin an tum ang ngawta chawp leh chilha tihreh erawh a har a, mahse tha an thlah dawn lo a ti.

Kuhva tawlh hian state chhunga kuhva chingtute eizawna a tih chhiat bakah black money a ti punga, zirlaite hmakhua a tihchhiat bakah inhmun lo ram a ti to em em a ni a ti a, Chuvang chuan danlo a kuhva tawlh dona kawngah Sorkar chuan tha a thlah dawn lo a ni, a ti.

Pu K Sapdanga chuan, aikal tibo tura hma an lakna kawngah huaisen taka kalin, ring an tikhawnglui a tunah chuan sorkar hnathawk aikal lak an tibo thei ta a ni, a ti a. Office hun bi dik taka vawng turin hma an la tih sawiin, tunah chuan Sorkar hnathawkte pawhin Office ah hnathawh hun tam zawk an nei thei ta a ni, a ti.

Home Minister chuan, Sorkar kaltawh ten tithei bik tura insawia politics khelh nana an hman thin chu Assam Rifles insawn chhuah chung chang a ni a ti a, theih tawp chhuaha Chief Minister hmalakna chuan rah tha chhuahin, Assam Rifles insawnchhuahna tur thuthlung an ziak fel thei ta a ni a ti a, hetih lai hian an sorkar laia sawn chhuak chak em em eptu party lam chuan sawn chhuah an hlau leh lawi si a ni a ti.

MNF PR

MNF Senior Vice President, Dr. R. Lalthanglianah Chhiah chi hrang hrang ZPM sorkarin a tihpunte chu mirethei zawkte rawkna leh anmahni party mi leh sate inhaivurna a ni a ti.

He thu hi nimina Sinlung Hills Council inthlan lo awm tura a campaign-naah sawiin Dr.R.Lalthangliana chuan ZPM sorkar tharin oil man a tihsan chu MNF-in a do hrim hrim vang ni lovin; a man tih sanna a tam tham em avang leh inthlan campaign laia chhiah tihpun loh sawi fo thinten mipui an bun nasat avang zawk a ni a ti a, sorkarin tuialhthei man a tihsan vangin chawpchilh takah nitina mamawh a tel lova khawsak theih loh buh leh chawhmeh man hrang hrang - Dal, Tel, Alu, Tomato, Nutrella, Chana, Atta, Zikhlum, Purun, Badam mante pungin, cement man pawh bag-ah Rs 500 vel ni thin kha Rs. 570 atanga Rs. 610 atanga tihpun a nih thu leh wheat man thlenga a san thu a sawi.

Dr. R. Lalthangliana chuan thil man a to tawh chuan a tlakhniam tawh ngai loh thu sawiin, covid lai khan Kuva pack khat Rs 50 a ni a, tun thlengin a tlahniam leh tawh lo a, chuvangin tuna thil man to chi hrang hrangte hian khawsak harsa zawkte a a la nghawng dawn chauh a. Lirthei chuan man leh sa man thlengin a la rawn to chhonzawm zel dawn a ni, a ti.

MNF Senior Vice President chuan ZPM-ten thlai thar leh hmunphiah an lei tur chu, kum khat dawn tep an pawh a la hlawhtling thei lo a ti a, tun thlenga hmunphiah an la leisak thei lo chu pawh a tih thu leh vanduaithlak a tih thu a sawi a, hengte hi ruahmanna fel tawh loh rah chhuah a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theiha dah a ni

<><><>

PM IN AMRELI

Prime Minister Narendra Modia cuan nimin khan Gujarat-a Amreli atangin hmasawna project hrang hrang cheng vaibelchhe 4900 hu a hawng. Prime Minister Modia hian ruahtui khawlna tur project Dhudhala khuaa Bharat Mata Sarovar a hawng bawh a. He project hi Dholia Foundation leh Gujarat sawrkar tangdunin an siam a ni.

Thusawin PM Modia chuan project hawn takte chu kawngpui, relkawng, tui leh khualzin hipna thil an ni tih sawiin khua leh tuite tan a hlawk dawn hle a ni a ti a. Saurashtra, Kutch, Junagadh, Porbandar leh Botad district mipuiten an chhawr tangkai dawn a ni a ti bawh.

Kan correspondent report i lo ngaithla ang u.

<><><>

CYBER CRIME

Indian Cybercrime Coordinationi Centre (I4C) chuan internet kaltlanga pawisa thawna lem lakah mipuite fimkhur turin a chah. Heng bank account lem hmang hian khawvel puma inzarpharh internet lama mi bum chingten mipuite sum chu chhehrelh theih angin an thlem thin niin Union Home

Ministry chuan a sawi a. Tunhnaia Gujarat Police leh Andhra Pradesh Police ten rampum huapa chhui hna an thawhnaah heng ramdang nena inzawm mi bum chingte hian bank account lem emaw mi bank accoung hawhin emaw pawsai inthawna lem hi an siam tih an hmuchhuak a. Indian Cyber Crime Coordination Centre chuan mipuite chu an bank account hralh emaw hman hawh tir lo turite leh Udhyam Aadhar Registrationte midang hnena pe lo turin a chah a. Hetianga dan kalha sum chet tir avang hian man hial tawh theih a ni a. Inbumna lam thil tawh apiangin helpline number 1930 emaw www.cybercrime.gov.in leh social media lamah cyberDost ah te hriattir tur a ni.

<><><>

ROZGAR MELA

Vawiina Rozgar Mela hman turah Prime Minister Narendra Modia chuan sawrkar hna hmu thar thalai sing 5 leh sang 1 chuangte hnenah appointment letter a sem dawn. Rozgar Mela hi ramchhung hmun 40 ah huaihawt a ni dawn a. PM Modia hian video conference hmangin heng hna hmu tharte appoinment letter hi a sem dawn a ni.

<><><>